

Nos Hendenan

Special

**Skirbi
pa
Mercedes Abdul**

Vale Croes:

PA 16 AÑA CONSECUTIVO A LOGRA HACI HENDE "YORA DI HARI"

E persona invita awe den nos espacio "Nos Hendenan Special" ta señor Rudolfo Valentino Croes, popularmente conoci como "Vale Croes". E ta conta nos con su bida a desaroya desde mucha te awor, y tambe tocante su don pa haci hende "yora di hari" cu su humorismo y con su trayectoria como humorista presentando shownan comico a cumenza.

ESTUDIO Y TRABAO: Di mucha Vale Croes a bishita St. Antonius School, y ora el a caba su enseñanza basico el a sigui pa M.L.King School, unda el a caba como Carpinte exitosamente.

"Mi prome trabao, na aña 1969, tabata na "Bosch Plastics" unda mi a traha como peon, ganando 1 florin pa ora. Eynan mi a traha cinco luna, y despues mi a bay traha pa Parsons Corporation, den Lago, como carpinte B-class.

Di eynan trabao a caba y na aña 71 mi a bay Hulanda pa bay siña den e ramo di "fiberglass". Desafortunadamente mi no a haya e chens aki. Ta asina cu mi a bay riba mi mes pero ora mi a yega nan tabata kitando hende for di "Fokker Fabriek".

Mi a keda na Hulanda mas of menos seis luna vagando, cu un trabao aki un trabao aya, y semper cu Aruba den mente. Bolbe mi a bolbe, ora mi a pidi Gobierno Hulandes manda mi bek, y esey a sosode tambe".

Ora Vale Croes a bolbe Aruba el a cumenza traha cu Arston Corporation, pa un aña y 8 luna como carpinte.

"Di eynan mi a bay traha cu TAV na unda mi a bay labora como "maintenance" na Casa Cuna, di aña 1977 te 1980. Na aña 1980 mi a cumenza traha riba mi mes".

CONTRATISTA CHIQUITO: "Mi a lanta un compania contratista chiquito pa traha cas, cual a bay hopi bon. Mi a construi cas pa tur hende, menos pa mi mes, den un transcurso di 5 aña consecutivo. Sinembargo, desde cu mi a cumenza traha mi tabata construi cas como "side job". Den e periodo aki mi a traha por lo



menos 15 cas.

Tambe na aña '80 mi a bay traha pa ocho luna cu Meta Corporation como guia turistico".

COMO AMBTENAAR: "Debi cu mi a haya problema cu lomba mi a cumenza traha cu gobierno, di cual mi tin aworaki 16 aña ta traha.

Na aña 1981 mi a cumenza na Domein Beheer como bewaker di Bestuurskantoor.

E tempo ey tabata gobierno di MEP cu Betico na mando. E temponan aya tabata hopi dushi y esaki ta e prome trabao cu mi a cumenza core warda. Despues, Daniel Leo (di feliz memoria) a ponemi traha cu Oficina di Turismo e mesun trabao cu mi tabata haci na De Veer, pero e biaha aki den Caya Grandi.

Ey mi a keda dos aña y mey y ora cu señor Rory Arends a bira director di ATA el a yama mi bay traha paden. Di eynan mi a

traha te aña 1994. Mi a pidi mi traslado aña pasa for di ATA pa Instituto di Cultura, unda mi ta duna orientacion y conseho pa personanan cu ta bin cu proyectonan cultural".

Na Instituto di Cultura Vale Croes ta trahando riba diferente proyecto, di cual e ta menciona especificamente dos:

PLAN DESAROYO COMUNITARIO: "Mi ta ocupa aworaki cu e proyecto Plan Desaroyo Comunitario di cual a sali un idea sumamente bunita cu nos a yama "Pasco den Bario". E ta un idea di Minister Lili Beke cu a cumenza na october aña pasa, y a bay fantasticamente bon. E aña aki atrobe nos tine. Den e trabao aki ta sr. Robert Maduro y mi persona ta haci tur trabao, ta bin cu ideanan, prepara e bandanan musical, entre otro, gruponan di gaita, etc".

PROYECTONAN ADICIONAL: "Dia Nacional di Mucha tambe sr. Robert Maduro y mi persona ta encarga cu esaki. E ta bay bira mas grandi cu tur aña pasobra nos ta bay pone mas enfasis y energia riba e actividadnan cu

ta bay bin strictamente pa mucha. Pero aworaki nos no por adelanta nada".

Pa conta riba su don humoristico Vale a bay bek te su bida na school, y su bida como cantante.

SU BIDA NA SCHOOL: "Considera pa e juffrouw y e meneernan di e tempo aya mi tabata pret. Awendia sinembargo, nan tin otro number pe: 'hiperactivo'. Es mas, awendia tin number pa tur cos, pasobra cu mi ta corda hende tabata muri di dos cos e tempo aya: of sea el a muri direpente of el a muri di algo hopi malo. Awendia bo ta scoge e malesa di cual bo kier muri di dje cu 'number y fam'.

Na school mi tabata canta, hunga comedia y haci pret cu e muchanan y asina poco poco el a keda. E ta un don cu mi a haya for di nos Tata Celestial cu den mi mama caba tabata, y asina mi a haye tambe".

SU BIDA ARTISTICO: "Ora cu mi a cumpli 15 aña mi a drenta den Mariachi Perla di Aruba, den cual mi a canta 4 aña. Den e temporada aki mi a biaha pa prome bez pa Bonaire y Curaçao. Mi a keda inactivo den cantamento te cu 21 aña (tempo cu mi a bay Hulanda). Cu 22 aña mi a drenta den e "Banda Sensacion del Caribe", cu nan mi a canta 5 aña y despues mi a stop. Solamente algun biaha mariachinan tabata pidi mi bay canta cu nan, duna serenata, etc.

Den e Banda Sensacion del Caribe, na aña 1973, mi a cumenza cu cantamento di chasco, y e muchanan di e banda tabata forza mi pa mi conta chasco pa publico. Y asina na un elegimento di reina den Club di Conney Francis mi a cumenza.

Esaki tabata mi prome show publico di cantamento di chasco.

E aña siguiente mi a bira Pancho di Aruba hunto cu mi Prins. Nos a sali e tempo ey Prins Lenga y Pancho Coriente, mi persona y Robby Jansen. Na aña 1979 mi a sali "Prins der Prinsen".

SHOW DI VALE: "Na 1981 mi a cumenza cu Show di Vale cual den cumenzamento no tabata tin mucho exito. Mi a busca e mehor temporada y den transcurso di cinco aña mi a bin haya e temporada perfecto cu ta despues di vacacion grandi

di muchanan di school. Esey kiermen final di augustus.

Mescos cu na Aruba inicio di e show na Curaçao tabata malo, y Bonaire mescos. Pero den e transcurso di añanan tambe a bira bon. Mi kier a conta solamente mi experiencia na Curaçao.

Con mi a worde gusta na Curaçao?. Mi a worde acerca pa un miembro di Willemstad Jaycees y nan tabata tin prepara un clash comico.

Nan tabata tin ocho comico di Curaçao y e meneer aki a bin pidi ami pa bay representa Aruba. Mi a bise cu si, mi ta bay. El a puntra mi kico mi ta cobra. Mi a pensa bon y mi a bisele nada, solamente e mester duna mi dos pasashi, un bon camber di hotel pa dos hende. Esey ta mi casa y ami mes. El a keda masha contento y e show mes a bay fantastico y asina mi a haci mi entrada na Curaçao. Por cierto, despues di purba asina hopi na Aruba, por fin na Curaçao, na 1984, mi a bin logra traha mi prome yiu". Den e transcurso di 1981 te 1996 Vale Croes a duna 15 show. Es decir, un show pa aña, cu a worde presenta na publico pa 15 dia te 20 dia largo na Aruba y na Curaçao 9 dia.

SU BIDA NA CAS: Vale Croes ta casa cu Lourdes Correia de Andrade, di cual matrimonio tin 4 yiu. Dos di dje y dos di su prome casa.

"Mi bida na cas ta serio cu e muchanan, siña nan respet nan mes pa nan haya respet riba caya, papia cu nan tur ora, no laga nan tuma decisionnan so, y duna nan e confianza cu cualquier dia nan tin problema nan por bati na bo porta y abo sali pa nan. Asina bo ta traha bo famia. Mester tin tempo pa tur cos, no laga nan bay ningun caminda nan so.

Pero e cara humoristico di Vale tey tur ora, pero ora cu mester ta serio ta serio!"

SU PASATEMPO: "Mi pasatiempo mas gusta ta, ta cu mi famia. Otro hobbie cu mi ta gusta ta entretene hende y mi deporte favorito ta boxeo".

TOCANTE HUBENTUD: "Mi ta kere cu hubentud ta masha bon. Ta e mayornan mester percura of mester a percura pa nan yiunan ta hende drechi awe. Esaki a base di amor, atencion, comunicacion, respet y dedica hopi tempo na nan yiunan".

**MIHOR BO PERDE UN MINUUT DEN BO BIDA,
CU BO PERDE BO BIDA DEN UN MINUUT**

Mesahe di DIARIO